

MALAYSIA
DEWAN RAKYAT
ATURAN URUSAN MESYUARAT

NASKAH SAHIH/BAHASA MALAYSIA

<http://www.parlimen.gov.my>

HARI KHAMIS, 23 MAC 2017, PUKUL 10.00 PAGI

Bil. 6

WAKTU PERTANYAAN-PERTANYAAN MENTERI

1. PR-1351-MQT0057
Dato' Sri Ikmal Hisham Bin Abdul Aziz [Tanah Merah] minta **MENTERI KESIHATAN** menyatakan sejauh manakah seriusnya wabak selesema burung yang berlaku di Kelantan. Apakah puncanya dan apakah langkah yang dilakukan oleh Kementerian bagi memastikan rakyat Kelantan tidak terus diancam wabak tersebut.
2. PR-1351-MQT0047
Datuk Dr. Haji Abd. Latiff Bin Ahmad [Mersing] minta **MENTERI TENAGA, TEKNOLOGI HIJAU DAN AIR** menyatakan dengan jelas apakah perbezaan NEM dan FIT, mekanisme perlaksanaan dan apakah impak dan faedah program berbanding mekanisme FIT.
3. PR-1351-MQT0050
Dato' Takiyuddin Bin Hassan [Kota Bharu] minta **MENTERI PERTANIAN DAN INDUSTRI ASAS TANI** menyatakan apakah punca-punca yang dikenal pasti berlakunya penularan virus selesema burung (H5N1) ke atas unggas seperti mana yang berlaku di Kota Bharu, Pasir Mas dan beberapa daerah lain di Kelantan baru-baru ini dan apakah langkah-langkah yang akan diambil oleh Kementerian untuk mencegahnya di masa akan datang.

MALAYSIA**DEWAN RAKYAT****ATURAN URUSAN MESYUARAT****NASKAH SAHIH/BAHASA MALAYSIA**<http://www.parlimen.gov.my>**HARI KHAMIS, 23 MAC 2017, PUKUL 10.00 PAGI****Bil. 12**

WAKTU PERTANYAAN-PERTANYAAN MENTERI

PERTANYAAN-PERTANYAAN BAGI JAWAB LISAN

1. PR-1351-L00010
Dato' Haji Abdul Rahman Bin Mohamad [Lipis] minta **MENTERI PENDIDIKAN** menyatakan punca kegagalan pemberian Telefon Yes Altitude 4G untuk guru-guru di Negeri Pahang sedangkan guru di beberapa buah negeri lain sudah mula menikmati pemberian tersebut yang mana ianya dapat memudahkan guru untuk menggunakan aplikasi berasaskan sistem Internet.
2. PR-1351-L01146
Tuan Ahmad Marzuk Bin Shaary [Bachok] minta **MENTERI TENAGA, TEKNOLOGI HIJAU DAN AIR** menyatakan laporan kajian terkini projek pembinaan Empangan Lebir dan Nenggiri. Nyatakan jumlah keluasan kawasan yang bakal ditenggelamkan.
3. PR-1351-L00265
Datuk Dr. Haji. Abd. Latiff Bin Ahmad [Mersing] minta **MENTERI SUMBER MANUSIA** menyatakan :-
 - (a) apakah kemudahan-kemudahan yang boleh dinikmati oleh pencarum PERKESO; dan
 - (b) berapa banyakkah majikan yang dikenakan tindakan kerana gagal mencarum dengan PERKESO untuk tahun 2015/2016.
4. PR-1351-L00594
Tuan Nga Kor Ming [Taiping] minta **MENTERI PENDIDIKAN TINGGI** menyatakan apakah rancangan konkrit dan tindakan Kerajaan untuk meningkatkan kedudukan universiti tempatan di Times Higher Education World University Ranking selaras dengan wawasan negara menjadi pusat pendidikan pengajian tinggi di rantau ini.

5. PR-1351-L00129
Tuan Anuar Bin Abd. Manap [Sekijang] minta **MENTERI DALAM NEGERI** menyatakan apakah punca masalah keberhutangan tinggi dalam kalangan anggota polis di negara ini seperti yang dinyatakan oleh Timbalan Pengarah Pengurusan (Latihan) Polis Diraja Malaysia (PDRM) DCP Datuk T. Narenasagaran baru-baru ini dan apakah usaha yang dilakukan PDRM bagi memberi asas pendidikan pengurusan kewangan kepada anggotanya.
6. PR-1351-L00882
Puan Nurul Izzah Binti Anwar [Lembah Pantai] minta **MENTERI KEWANGAN** menyatakan :-
 - (a) anggaran peruntukan tahunan untuk aspek keselamatan MRT; dan
 - (b) Prosedur Operasi Standard (SOP) keselamatan khususnya pada waktu kecemasan atau ancaman serangan daripada pengganas dan jumlah kekuatan polis bantuan di setiap stesen MRT.
7. PR-1351-L00920
Datuk Rozman Bin Isli [Labuan] minta **MENTERI KESIHATAN** menyatakan apakah hasil daripada audit terperinci yang dilakukan di hospital-hospital yang berusia lebih 50 hingga 100 tahun serta apakah tindakan proaktif Kementerian dalam memastikan kejadian yang menimpa Hospital Sultanah Aminah (HSA), Johor Bahru tidak berulang di mana-mana hospital Kerajaan mahupun swasta.
8. PR-1351-L01134
Tuan Ng Wei Aik [Tanjong] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan skim-skim "money games" bersifat Multi-Level Marketing (MLM) yang telah dikenal pasti di Malaysia. Apakah usaha-usaha yang akan diambil terhadap skim-skim tersebut memandangkan gerakerja-gerakerja semakin berleluasa kebelakangan ini.
9. PR-1351-L00028
Datuk Haji Shabudin Bin Yahaya [Tasek Gelugor] minta **MENTERI PERTANIAN DAN INDUSTRI ASAS TANI** menyatakan apakah status terkini pasar belian terus hasil pertanian, MyFarm Outlet di Semenanjung dalam usaha Kementerian menangani peningkatan kos sara hidup rakyat.
10. PR-1351-L00701
Datuk Mohd Idris Bin Jusi [Batu Pahat] minta **MENTERI PENDIDIKAN TINGGI** menyatakan struktur pendapatan setiap Institusi Pengajian Tinggi Awam (IPTA) iaitu berapakah pembiayaan Kerajaan, yuran pelajar, pembiayaan sendiri IPTA dan bagaimana IPTA dikenakan menjana pendapatan tersebut.

11. PR-1351-L00285
Ir. Shahrudin Bin Ismail [Kangar] minta **MENTERI PENDIDIKAN** menyatakan berapakah jumlah sekolah yang sedang melaksanakan projek rintis inisiatif penempatan pembantu guru yang dijalankan di Perlis buat masa ini dan apakah kekangan yang dihadapi Kementerian dalam memenuhi tuntutan keperluan pembantu guru ini.
12. PR-1351-L01270
Tuan Su Keong Siong [Ipoh Timur] minta **MENTERI KEWANGAN** menyatakan statistik paras hutang isi rumah "household debts" untuk tahun 2013 hingga 2016. Apakah rancangan Kerajaan untuk membendung kenaikan hutang isi rumah ini.
13. PR-1351-L00111
Dato' Dr. Haji Noor Azmi Bin Ghazali [Bagan Serai] minta **MENTERI KESIHATAN** menyatakan apakah Kerajaan mempunyai cara yang sistematik dalam pengawalan denggi dari kaedah pendidikan penyakit, kawalan nyamuk, kesedaran rakyat, pemantauan serta penyelidikan yang berterusan untuk menangani penyakit yang semakin meningkat dan membawa maut.
14. PR-1351-L00564
Dato' Kamarul Baharin Bin Abbas [Telok Kemang] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan bagaimana Kementerian menangani masalah penjualan barangan tiruan melalui online ataupun Internet memandangkan perniagaan di atas talian ini semakin mendapat sambutan masyarakat dan pengguna.
15. PR-1351-L00786
Tuan Haji Ahmad Lai Bin Bujang [Sibuti] minta **MENTERI PENDIDIKAN** menyatakan apakah langkah Kementerian untuk meningkat minat pelajar memilih jurusan STEM (Science, Technology, Engineering & Mathematic) yang menurut Kajian Akademik Sains Malaysia sangat berkurang di peringkat pendidikan menengah atas.
16. PR-1351-L00151
Dr. Michael Jeyakumar Devaraj [Sungai Siput] minta **MENTERI KESIHATAN** menyatakan jumlah nilai barangan dan perkhidmatan yang diperolehi oleh Kementerian Kesihatan melalui kontraktor-kontraktor dalam tahun 2015 dan 2016. Apakah mekanisme yang wujud untuk memastikan rakyat dapat nilai yang berpatutan pada harga yang dibayar.
17. PR-1351-L00474
Datuk Raime Bin Unggi [Tenom] minta **MENTERI KEMAJUAN LUAR BANDAR DAN WILAYAH** menyatakan perkembangan terkini pelaksanaan menaik taraf jalan-jalan bermasalah di luar bandar seperti Jalan Kampung Rundum, Kampung Korolok dan Kampung Kapulu yang mana digunakan oleh penduduk dan juga pendidik untuk bertugas.

18. PR-1351-L01025
Puan Siti Zailah Binti Mohd Yusoff [Rantau Panjang] minta **PERDANA MENTERI** menyatakan kos yang terlibat dalam mengurus mangsa banjir tahun 2014 dan 2017 di Kelantan, Terengganu, Pahang dan Johor.
19. PR-1351-L00441
Tuan Budiman Bin Mohd Zohdi [Sungai Besar] minta **MENTERI PENDIDIKAN** menyatakan apakah bentuk kerjasama yang dijalankan oleh pihak Kementerian dengan agensi Kerajaan lain seperti pihak polis serta Agensi Anti Dadah Kebangsaan (AADK) dalam membendung masalah gejala dadah di kalangan pelajar sekolah.
20. PR-1351-L00616
Tuan M. Kulasegaran [Ipoh Barat] minta **PERDANA MENTERI** menyatakan apakah rasional di sebalik penubuhan-penubuhan MyEG. Adakah perlu penambahan birokrasi dan karenah untuk orang awam supaya individu-individu tertentu menjadi lebih kaya.
21. PR-1351-L00565
Dato' Abd Aziz Bin Sheikh Fadzir [Kulim Bandar Baharu] minta **MENTERI SAINS, TEKNOLOGI DAN INOVASI** menyatakan jumlah kajian penerbitan yang telah dihasilkan oleh saintis negara yang telah menjadi rujukan di peringkat antarabangsa sehingga kini dan apakah usaha Kementerian bagi meningkatkan lagi penghasilan hasil kajian saintis tempatan yang bertaraf antarabangsa bagi tujuan pengkomersialan di peringkat global.
22. PR-1351-L00198
Tuan Wong Tien Fatt @ Wong Nyuk Foh [Sandakan] minta **MENTERI KEWANGAN** menyatakan statistik pemberian BR1M dengan butiran-butiran mengikut pecahan negeri, kaum dan golongan umur dari tahun 2012 hingga 2016.
23. PR-1351-L00226
Dato' Sri Haji Abdul Manan Bin Ismail [Paya Besar] minta **MENTERI PENDIDIKAN** menyatakan setakat mana pelaksanaan Kementerian menerusi Jabatan Pendidikan Negeri menggantikan bangunan berkayu sekolah rendah, sekolah menengah dan sekolah menengah agama di seluruh negara.
24. PR-1351-L00237
Tuan William Leong Jee Keen [Selayang] minta **MENTERI PERDAGANGAN ANTARABANGSA DAN INDUSTRI** menyatakan sama ada AP, import, cukai eksais dan jualan akan dimansuhkan dengan pegangan majoriti Proton Holdings Berhad dijual kepada syarikat-syarikat asing dan kesannya terhadap program vendor tempatan.

25. PR-1351-L91373
Dato' Sri Abdul Azeez Bin Abdul Rahim [Baling] minta **PERDANA MENTERI** menyatakan sama ada bercadang untuk menubuhkan Suruhanjaya Siasatan Diraja berhubung dengan dakwaan kerugian Bank Negara Malaysia dalam aktiviti tukaran mata wang asing (Forex) sepanjang tahun 1991 sehingga 1993.
26. PR-1351-L00652
Dato' Seri Dr. Wan Azizah Bin Wan Ismail [Permatang Pauh] minta **MENTERI PENDIDIKAN TINGGI** menyatakan susulan daripada pemotongan bajet bagi universiti awam, sejauh mana pemotongan ini memberi kesan kepada penarafan universiti awam di dalam QS World Universiti Ranking serta apakah sasaran Kementerian dalam penghasilan penyelidikan dan kertas kerja kajian yang dikeluarkan oleh 20 universiti awam bagi tempoh lima tahun.
27. PR-1351-L00068
Datuk Sapawi Bin Ahmad Wasali [Sipitang] minta **MENTERI KERJA RAYA** menyatakan kemajuan pelaksanaan Projek Pan-Borneo bagi kedua-dua jajaran Sabah dan Sarawak sehingga kini, dan apakah halangan dihadapi oleh pihak kontraktor dalam melaksanakannya.
28. PR-1351-L01192
Dato' Seri Mohamed Azmin Bin Ali [Gombak] minta **MENTERI PERDAGANGAN AMTARABANGSA DAN INDUSTRI** menyatakan apakah jaminan Kerajaan terhadap kebajikan tenaga kerja dan vendor tempatan dalam industri automotif berikutan penjualan 51% ekuiti PROTON.
29. PR-1351-L00052
Datuk Wilson Ugak Anak Kumbong [Hulu Rajang] minta **MENTERI PENGANGKUTAN** menyatakan adakah pihak Kementerian bercadang untuk membina stesen penguat kuasa JPJ di Jalan Bintulu - Bakun.
30. PR-1351-L00957
Tuan Mohamed Hanipa Bin Maidin [Sepang] minta **MENTERI PELANCONGAN DAN KEBUDAYAAN** menyatakan :-
- (a) adakah Kementerian mempunyai perancangan untuk memajukan Kg Batu Laut di Sepang sebagai destinasi pelancongan; dan
 - (b) apakah langkah-langkah yang telah diambil oleh Kementerian untuk mempopularkan kejohanan sukan perahu layar antarabangsa di Kg Batu Laut.

31. PR-1351-L00708

Tuan Gobind Singh Deo [Puchong] minta **MENTERI DALAM NEGERI** menyatakan bilangan kanak-kanak di bawah 18 tahun tanpa kewarganegaraan sejak 2010 (dari tahun ke tahun) dan menyatakan langkah-langkah yang diambil untuk menangani isu kanak-kanak tanpa kewarganegaraan dan bagaimana keadaan kanak-kanak ini untuk persekolahan sementara itu.

32. PR-1351-L00153

Laksamana Pertama Mohamad Imran Bin Abd Hamid (B) [Lumut] minta **MENTERI PERTAHANAN** menyatakan bilakah terma-terma perkhidmatan warga tentera akan dikaji semula dan dipinda sesuai dengan usia pencen wajib kakitangan awam sekarang ditingkatkan kepada 60 tahun.

33. PR-1351-L01349

Tuan Khoo Soo Seang [Tebrau] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah status keberkesanan selepas pindaan dan penguatkuasaan Akta Pemajuan Perumahan (Kawalan dan Perlesenan) 1966 dalam membantu pengurangan kepada projek rumah terbelengkalai serta status pemulihan projek rumah terbelengkalai sedia ada seluruh negara.

34. PR-1351-L00995

Tuan Wong Ling Biu [Sarikei] minta **MENTERI KEWANGAN** menyatakan selepas penurunan nilai Ringgit Malaysia dan pelaksanaan GST serta kenaikan harga minyak mentah dan kos sara hidup, adakah Kementerian mempertimbangkan menetapkan harga tertinggi kepada runcit bagi RON95 dan diesel.

35. PR-1351-L00231

Tuan Haji Hasbi Bin Habibollah [Limbang] minta **MENTERI KOMUNIKASI DAN MULTIMEDIA** menyatakan :-

- (a) mengapakah sejak beberapa bulan kebelakangan ini "signal" telekomunikasi amatlah tidak memuaskan di Parlimen Limbang dan apakah langkah-langkah yang telah diambil untuk mengatasi masalah tersebut; dan
- (b) adakah Kerajaan akan membina 4 buah menara telekomunikasi baru di luar bandar Limbang iaitu Ulu Tubai, Melaban, Lupak Rangas dan di persimpangan jalan persekutuan Batu Danau/Medamit agar penduduk persekitaran mendapat liputan sekular.

36. PR-1351-L01116
Dato' Sri Ikmal Hisham Bin Abdul Aziz [Tanah Merah] minta **MENTERI KOMUNIKASI DAN MULTIMEDIA** menyatakan setakat ini berapa banyak laman web yang disekat kerana boleh menggugat ketenteraman awam.
37. PR-1351-L00798
Tuan Ignatius Dorell Leiking [Penampang] minta **MENTERI DALAM NEGERI** menyatakan adakah Kementerian akan bersetuju bahawa salah satunya penyelesaian masalah Pendatang Tanpa Izin yang telah menjadi warga Sabah melalui Projek IC adalah melalui penurunan (devolution/ decentralization) kuasa kepada Kerajaan Sabah untuk menarik balik MyKad yang ada di Sabah dan melaksanakan pendaftaran balik dengan mengeluarkan kad pengenalan khas untuk rakyat Sabah.
38. PR-1351-L00305
Dato' Sri Dr. Haji Irmohizam Bin Ibrahim [Kuala Selangor] minta **PERDANA MENTERI** menyatakan prestasi terkini keseluruhan kewangan semasa FELDA dan anak syarikatnya FGV dan nyatakan penjelasan terperinci berkaitan sejumlah wang bernilai RM 4.3 bilion milik FELDA yang tidak dapat dikenal pasti perbelanjaannya.
39. PR-1351-L00497
Tuan Wong Chen [Kelana Jaya] minta **PERDANA MENTERI** menyatakan :-
- (a) bilangan lesen bagi pengangkutan gas yang telah dikeluarkan di bawah Seksyen 11B Akta Bekalan Gas (Pindaan) 2016; dan
 - (b) sekiranya ada, berikan butiran terperinci lesen-lesen tersebut.
40. PR-1351-L00828
Dato' Sri Douglas Uggah Embas [Betong] minta **PERDANA MENTERI** menyatakan secara terperinci kadar kemiskinan di Sarawak dan berikan pecahan mengikut kumpulan etnik.
41. PR-1351-L00320
Dato' Takiyuddin Bin Hassan [Kota Bharu] minta **MENTERI DALAM NEGERI** menyatakan apakah langkah-langkah yang telah diambil oleh Kerajaan dalam memerangi gejala judi yang makin berleluasa di negara ini sebagaimana yang pernah dijanjikan oleh pihak Kerajaan sendiri.
42. PR-1351-L00364
Datuk Aaron Ago Anak Dagang [Kanowit] minta **MENTERI PELANCONGAN DAN KEBUDAYAAN** menyatakan apakah perancangan strategik pihak Kementerian dalam menarik minat pelancong dari luar negara untuk datang melawat ke Sarawak.

43. PR-1351-L00640

Datuk Liang Teck Meng [Simpang Renggam] minta **MENTERI KOMUNIKASI DAN MULTIMEDIA** menyatakan tindakan susulan Kementerian dalam memastikan penyekatan ke atas mesej palsu, fakta yang terpesong serta yang mampu menghasut ketenteraman awam terutamanya sekali melalui arus media sosial. Adakah Kementerian bercadang untuk mengusulkan tindakan undang-undang yang lebih berat ke atas kelompok yang kurang bertanggungjawab.

44. PR-1351-L00093

Datuk Abd Rahim Bin Bakri [Kudat] minta **MENTERI KEMAJUAN LUAR BANDAR DAN WILAYAH** menyatakan bilakah Kerajaan bercadang untuk menaik taraf dan mengaspal Jalan Mangkubau Laut di daerah Pitas memandangkan jalan luar bandar ini merupakan laluan utama dan sering mendapat rungutan ramai pengguna.

45. PR-1351-L00258

Tuan Sim Tong Him [Kota Melaka] minta **MENTERI SUMBER ASLI DAN ALAM SEKITAR** menyatakan :-

- (a) jumlah keluasan hutan simpanan setiap negeri pada tahun 2016 dan juga keluasannya pada tahun 2000; dan
- (b) sebab-sebab yang mengakibatkan kekurangan drastik hutan simpanan ini.

46. PR-1351-L00953

Tuan Khalid Bin Abd. Samad [Shah Alam] minta **PERDANA MENTERI** menyatakan pendirian Kerajaan berhubung penubuhan RCI dalam kes 1MDB.

47. PR-1351-L01343

Tuan Manivannan A/L Gowindasamy [Kapar] minta **MENTERI DALAM NEGERI** menyatakan :-

- (a) secara perinci, hidangan makanan/minuman, kemudahan asas dan perkhidmatan perubatan yang disediakan kepada setiap banduan di setiap lokap seluruh Malaysia; dan
- (b) apakah status siasatan kes S. Bala Murugan, seorang tahanan yang meninggal dunia dalam tahanan polis pada 6 Februari 2017 di IPD Klang Utara. Apakah tindakan yang telah diambil terhadap anggota-anggota yang terlibat dalam operasi semasa penahanan beliau, Pegawai Serbuan (RO) kes tersebut, Pegawai Penyiasat (IO) kes tersebut dan Ketua Bahagian Siasatan Jenayah Daerah (KBSJD) Klang Utara.

48. PR-1351-L00483

Dr. Mansor Bin Abd Rahman [Sik] minta **MENTERI PENGANGKUTAN** menyatakan usaha Kementerian dan agensi yang terbabit dalam memastikan aktiviti-aktiviti bot penumpang yang karam tidak berulang dan apakah ada standard operating procedure (SOP) bagi aktiviti ini dijalankan serta pemantauan daripada pihak terbabit.

49. PR-1351-L00525

Dato' Mohd Ariff Sabri Bin Abdul Aziz [Raub] minta **PERDANA MENTERI** menyatakan :-

- (a) berapakah jumlah kesemua peneroka di Malaysia; dan
- (b) berapa ramaikah peneroka yang sudah diberi hak milik ke atas tanah mereka.

50. PR-1351-L00576

Tuan Shamsul Iskandar @ Yusre Bin Mohd Akin [Bukit Katil] minta **PERDANA MENTERI** menyatakan :-

- (a) sama ada pengesahan perkhidmatan Uber dan Grab di sisi undang-undang akan membawa kesan kepada pemandu Teksi; dan
- (b) langkah-langkah SPAD untuk meningkatkan daya persaingan yang sihat di antara Teksi dan Uber/Grab serta kualiti perkhidmatan mereka.

51. PR-1351-L01306

Dato' Abdullah Sani Bin Abdul Hamid [Kuala Langat] minta **MENTERI DALAM NEGERI** menyatakan jumlah pekerja asing yang tidak sah dari 31 Januari 2017 apabila kerajaan membenarkan pekerja asing yang tidak berdokumen dibenarkan dilayakkan sebagai pekerja asing yang disahkan.

52. PR-1351-L01236

Dato' Mansor Bin Othman [Nibong Tebal] minta **MENTERI KEWANGAN** menyatakan bagaimana Kerajaan bercadang melunaskan hutang 1MDB yang berjumlah AS\$6.5 bilion kepada Aabar Investment PJS (di bawah International Petroleum Investment Company ,IPIC Abu Dhabi.

53. PR-1351-L01069

Dr. Ong Kian Ming [Serdang] minta **MENTERI KERJA RAYA** menyatakan jumlah kos perbelanjaan untuk membina tembok baru dan menaik taraf jalan masuk ke rumah kediaman rasmi YDP Dewan Rakyat di Kuala Lumpur.

54. PR-1351-L00690
Tuan Jeff Ooi Chuan Aun [Jelutong] minta **PERDANA MENTERI** menyatakan kenapa kepentingan peneroka Felda serta pelabur Bumiputera dibiarkan tergendai disebabkan nilai saham Felda Global Ventures (FGV) jatuh menjunam 60% daripada RM4.82 selepas IPO pada 2012 hingga RM1.87 pada Februari 2017.
55. PR-1351-L00415
Tuan Zairil Khir Johari [Bukit Bendera] minta **PERDANA MENTERI** menyatakan sama ada Jabatan Statistik boleh mempertimbangkan penyediaan data mentah (raw data) bagi pengguna awam atau badan-badan penyelidikan, dan jika tidak, kenapa.
56. PR-1351-L00851
Tuan Wong Sze Phin @ Jimmy [Kota Kinabalu] minta **PERDANA MENTERI** menyatakan statistik bilangan orang Sabah yang bertugas sebagai pegawai atasan di jabatan Kerajaan negeri dan Persekutuan di Sabah berbanding orang Sarawak dan Semenanjung bagi tahun 2006-2016. Proses Borneonisasi mesti diteruskan untuk memastikan jawatan pegawai atasan diisi oleh orang Sabah sendiri.
57. PR-1351-L00868
Dr. Haji Izani Bin Husin [Pengkalan Chepa] minta **PERDANA MENTERI** menyatakan apakah langkah konkrit Kerajaan dalam menyelesaikan masalah ketirisan dalam agensi Kerajaan yang telah menyebabkan kehilangan berbilion ringgit seperti dilaporkan dalam Laporan Ketua Audit Negara.
58. PR-1351-L00902
Dr. Mohd Hatta Bin Md Ramli [Kuala Krai] minta **PERDANA MENTERI** menyatakan sama ada kabinet telah bersetuju untuk menubuhkan Suruhanjaya Siasatan Diraja (RCI) mengenai skandal 1MDB.
59. PR-1351-L00961
Dato' Dr. Mujahid Bin Yusof Rawa [Parit Buntar] minta **MENTERI SUMBER MANUSIA** menyatakan sasaran dan rancangan mengurangkan kebergantungan ke atas pekerja asing.

ATURAN URUSAN MESYUARAT DAN USUL-USUL

1. **Usul dibuat oleh Yang Berhormat Datuk Liang Teck Meng [Simpang Renggam] dan masalah dicadangkan :-**

“ Bahawa suatu ucapan yang tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih kerana Titah Ucapan Seri Paduka Baginda semasa membuka Penggal Kelima, Parlimen Yang Ketiga Belas.”

Menyambung semula Perbahasan atas masalah (22 Mac, 2017)

- | | | | | |
|----|---------------|--|------------|-----------------------------------|
| 2. | (D.R. 5/2017) | Rang Undang-Undang
Tambahan (2016) 2017 | Perbekalan | Bacaan Kali
Yang Kedua |
|----|---------------|--|------------|-----------------------------------|

DAN

YB Menteri Kewangan akan mencadangkan:-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan bahawa jumlah wang tambahan sebanyak sembilan ratus lapan puluh tujuh juta tujuh ratus enam puluh satu satu ratus tujuh puluh empat ringgit (RM987,761,174) diperuntukkan daripada Kumpulan Wang Pembangunan bagi tahun kewangan 2016 bagi Maksud dan Butiran (Projek) seperti yang dinyatakan dalam ruang pertama dan kedua penyata Anggaran Perbelanjaan Pembangunan Tambahan Pertama 2016 yang dibentangkan sebagai Kertas Perintah 2 Tahun 2017 dan yang disenaraikan di sebelah Maksud dan Butiran (Projek) dalam ruang sembilan dan sepuluh penyata tersebut.”

- | | | | | |
|----|----------------|--|----------|-----------------------------------|
| 3. | (D.R. 13/2016) | Rang Undang-undang
(Kaedah-Kaedah Pemulaan Tindakan Sivill)
2016 | Mahkamah | Bacaan Kali
Yang Kedua |
|----|----------------|--|----------|-----------------------------------|

[Menteri di Jabatan Perdana Menteri]

- | | | | |
|-----|----------------|---|-------------------------------|
| 4. | (D.R. 21/2016) | Rang Undang-undang Kebankrapan (Pindaan) 2016 | Bacaan Kali Yang Kedua |
| | | [Menteri di Jabatan Perdana Menteri] | |
| 5. | (D.R. 20/2016) | Rang Undang-undang Membaharui Undang-undang (Perkahwinan dan Perceraian) (Pindaan) 2016 | “ |
| | | [Menteri di Jabatan Perdana Menteri] | |
| 6. | (D.R. 1/2017) | Rang Undang-Undang Timbang dan Sukat (Pindaan) 2017 | “ |
| | | [Menteri Perdagangan Dalam Negeri, Koperasi dan Kepenggunaan] | |
| 7. | (D.R. 3/2017) | Rang Undang-Undang Perdagangan Strategik (Pindaan) 2017 | “ |
| | | [Menteri Perdagangan Antarabangsa Dan Industri] | |
| 8. | (D.R. 2/2017) | Rang Undang-Undang Institusi Pendidikan Tinggi Swasta (Pindaan) 2017 | “ |
| | | [Menteri Pendidikan Tinggi] | |
| 9. | (D.R. 4/2017) | Rang Undang-Undang Saraan Hakim (Pindaan) 2017 | “ |
| | | [Menteri di Jabatan Perdana Menteri] | |
| 10. | (D.R. 25/2016) | Rang Undang-undang Setem (Pindaan) 2016 | “ |
| | | [Menteri Kewangan] | |

11. **Menteri Kewangan akan mencadangkan:-**

“Bahawa mengikut Seksyen 5, Akta Persatuan Pembangunan Antarabangsa 1960 (Akta 431), Dewan ini mengambil ketetapan bahawa sumbangan Malaysia sebanyak USD27,000,000.00 kepada Program Penambahan Dana Ke 18 Persatuan Pembangunan Antarabangsa (IDA) diluluskan”.

12. **Menteri Kewangan akan mencadangkan:-**

“Bahawa Dewan ini, mengikut peruntukan :

(i) perenggan 4(b) Akta Pendanaan Kerajaan 1983 [Akta 275], mengambil ketetapan supaya Kerajaan memindahkan sebanyak RM20,500 juta wang terimaan Terbitan Pelaburan Kerajaan Malaysia (MGII) di bawah seksyen 3(1) Akta yang sama

ke Kumpulan Wang Pembangunan yang dinyatakan dalam Jadual Kedua Akta Tatacara Kewangan 1957 [Akta 61] bagi maksud Kumpulan Wang tersebut”.

13. **Dato’ Seri Abdul Hadi bin Awang [Marang] akan mencadangkan:-**

“Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:-

Pindaan Seksyen 2

Akta Mahkamah Syariah (Bidang Kuasa Jenayah) 1965 [Akta 355] dipinda dalam proviso kepada seksyen 2 dengan menggantikan perkataan “***penjara selama tempoh melebihi tiga tahun atau denda melebihi lima ribu ringgit atau sebatan melebihi enam kali*** “ dengan perkataan “***penjara selama tempoh melebihi tiga puluh tahun atau denda melebihi satu ratus ribu ringgit atau sebatan satu ratus kali sebagaimana ditadbir selaras dengan tatacara jenayah Syariah***”.

[Menteri di Jabatan Perdana Menteri]

14. R-1351-U(27)002

Dr. Tan Seng Giaw [Kepong] akan mencadangkan :-

Bahawa Dewan ini membahaskan masalah akibat penarikan Amerika Syarikat daripada TPPA.

[Menteri Perdagangan Antarabangsa Dan Industri]

15. PR-1351-U(27)003

Datuk Dr. Makin @ Marcus Mojigoh [Putatan] akan mencadangkan :-
 “Bahawa Dewan ini mengambil maklum bahawa, pertumbuhan penduduk di daerah Putatan adalah begitu mendadak sekali dan ditokok tambah dengan pembangunan infrastruktur yang rancak seiring dengan statusnya sebagai satu daripada daerah yang rancak membangun di negeri Sabah khususnya.

Dan mengambil maklum juga bahawa, dewasa ini, isu masalah sosial, keselamatan sosial serta ketenteraman sosial menjadi topik bualan harian di kalangan warga Putatan. Setiap hari ketiga-tiga topik ini akan kedengaran malah menjadi kegusaran bagi warga Putatan kerana kehadiran anggota keselamatan yang amat kurang disebabkan cadangan pewujudan dan pembinaan ibu pejabat polis daerah Putatan telah lama tertangguh.

Dan mengambil maklum juga bahawa ketika ini, isu masalah sosial, keselamatan sosial serta ketenteraman sosial di Putatan adalah di bawah pentadbiran Ibu Pejabat Polis Daerah Penampang serta sebahagiannya di bawah pentadbiran Ibu Pejabat Polis Daerah Kota Kinabalu.

Mengambil maklum juga bahawa untuk menangani masalah sosial, keselamatan sosial serta ketenteraman sosial di daerah Putatan, hanya sebuah balai polis yang dianggotai kurang daripada 22 anggota dengan kelengkapan yang serba kekurangan, terpaksa berhempas pulas untuk menjaga daerah Putatan dengan keluasan 30km persegi dan berkepadatan penduduk melebihi 100 ribu orang.

Dan mengambil maklum juga bahawa, apabila berlakunya sesuatu jenayah atau kecemasan, ada kalanya ketibaan anggota keselamatan itu agak lewat kerana jarak tempat kejadian dengan IPD Penampang atau IPD Kota Kinabalu agak jauh dan mengambil masa untuk tiba.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan haruslah dengan segera meluluskan penubuhan dan pembinaan IPD Putatan lengkap dengan perjawatannya”.

[Menteri Dalam Negeri]

16. PR-1351-U(27)004

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa Perkara 11 Perlembagaan Persekutuan Malaysia memberikan semua rakyatnya kebebasan beragama.

Dan mengambil maklum juga bahawa Perkara 8 Perlembagaan Persekutuan Malaysia menjamin kesamarataan hak untuk warganya bagi menjalani kehidupan harian mereka.

Dan mengambil maklum juga bahawa, Malaysia sebagai negara peneraju gerakan kesederhanaan global di bawah pimpinan YAB. Perdana Menteri, telah berjaya memahat nama di persada antarabangsa di mana Malaysia menjadi model penerimaan kepelbagaian agama dan kaum sebagai sumber kekuatannya.

Dan mengambil maklum juga bahawa, konsep penerimaan kepelbagaian agama dan bangsa melalui Gagasan 1 Malaysia adalah model yang terbaik dalam mewujudkan keharmonian, kemakmuran dan perpaduan di negara ini.

Dan mengambil maklum juga bahawa Kerajaan pimpinan YAB. Perdana Menteri berjanji melalui manifesto Barisan Nasional pada PRU ke-13, untuk menyediakan lebih banyak bantuan kewangan kepada institusi-institusi agama berdaftar dan rumah-rumah ibadat.

Dan mengambil maklum dan contoh, bahawa Kerajaan Negeri Sabah dan Sarawak juga telah menyediakan dana khas dalam bajet tahunan mereka bagi maksud bantuan kewangan kepada institusi-institusi agama berdaftar dan rumah-rumah ibadat di negeri Sabah dan Sarawak.

Maka, bagi memenuhi aspirasi di atas dan rakyat bukan Islam khususnya, Dewan yang mulia ini hendaklah mengambil ketetapan bahawa Kerajaan Malaysia hendaklah menyediakan satu jumlah khas (dana) dalam bajet tahunan negara, bagi aktiviti institusi-institusi agama berdaftar dan rumah-rumah ibadat (bukan Islam)."

[Perdana Menteri]

17. PR-1351-U(27)005

Datuk Dr. Makin @ Marcus Mojigoh [Putatan] akan mencadangkan :-
"Bahawa Dewan ini mengambil maklum bahawa, Orang Asli yang terdiri daripada suku Semang (Negrito), Senoi dan Proto Malay adalah Orang Asli yang tinggal di Semenanjung Malaysia dan juga merupakan penghuni tertua di Semenanjung Malaysia.

Dan mengambil maklum juga bahawa, walaupun Orang Asli adalah merupakan penduduk asli Semenanjung Malaysia dan disebut sebagai "Bumiputera", namun mereka tidak menikmati keistimewaan yang diberikan kepada kaum Melayu dan Bumiputera negeri Sabah dan Sarawak di mana mereka tidak diiktiraf sebagai Bumiputera di bawah Perkara 153 Perlembagaan Persekutuan Malaysia.

Dan mengambil maklum juga bahawa, walaupun Jabatan Hal Ehwal Orang Asli (JHEOA) telah ditubuhkan pada tahun 1954 dan pindaan ke atas beberapa akta, seperti Akta Orang Asli 1954 telah dibuat bagi membolehkan dan meningkatkan sosio budaya dan ekonomi Orang Asli, namun kedudukan mereka tidak banyak berubah disebabkan status kedudukan mereka dalam Perlembagaan negara adalah kurang jelas.

Dan mengambil maklum juga bahawa, sesuai dengan konsep 1Malaysia yang diterajui oleh YAB. Perdana Menteri, kedudukan Orang Asli di negara ini hendaklah diterima semua dan diberikan hak dan layanan sama rata.

Dan mengambil maklum juga bahawa Perkara 8 Perlembagaan Persekutuan Malaysia menjamin kesamarataan hak untuk warganya bagi menjalani kehidupan harian mereka, termasuklah kaum Orang Asli.

Maka, bagi menangani kepincangan ini, Dewan ini hendaklah mengambil ketetapan bahawa, Perkara 153 Perlembagaan Persekutuan Malaysia serta perkara-perkara yang berkaitan, hendaklah dipinda bagi membolehkan Orang Asli dikategorikan sebagai Bumiputera dan diberikan hak Bumiputera, seiringan dengan orang-orang Melayu dan kaum Bumiputera Sabah dan Sarawak."

[Perdana Menteri]

18. PR-1351-U(27)006

Datuk Dr. Makin @ Marcus Mojigoh [Putatan] akan mencadangkan :-

"Bahawa Dewan ini mengambil maklum bahawa, masalah setinggan di bandar adalah masalah yang saban hari makin meningkat kerana migrasi dari luar bandar ke bandar, terutama sekali untuk tujuan mencari pekerjaan.

Dewan ini hendaklah juga mengambil maklum bahawa migran ekonomi yang berpindah daripada luar bandar ke bandar ini adalah dari golongan yang kurang berkemampuan/berpendapatan rendah dan mereka tidak mampu untuk membeli atau memiliki rumah-rumah yang dibina oleh pihak pemaju atau PR1MA yang ada pada ketika ini, di mana kebanyakan mereka ini hanya mampu untuk membayar kadar sewaan di bawah RM350 sebulan.

Dan mengambil maklum juga bahawa, matlamat Kerajaan mensasarkan sifar setinggan terutama sekali di kawasan bandar adalah agak sukar untuk dicapai selagi masalah perumahan bagi migran yang dimaksudkan di atas tidak ditangani secara tuntas.

Dan mengambil maklum juga bahawa, Program Perumahan Rakyat (PPR) yang dahulunya untuk sewaan tanpa had masa dilihat sebagai satu langkah alternatif bagi mengatasi masalah setinggan di bandar dan sekali gus memberikan kumpulan sasar untuk menduduki rumah yang agak selesa. Tetapi malangnya, status PPR tersebut telah dipinda kepada status rumah transit untuk pendudukan untuk tempoh tidak melebihi lima (5) tahun.

Dan mengambil maklum juga bahawa Program Perumahan Rakyat atau PPR yang ada sekarang ini merupakan sumber alternatif bagi mengatasi masalah setinggan di bandar di mana rumah-rumah PPR ini diubah syarat daripada sewaan kepada sewa beli bagi membolehkan mereka yang dimaksudkan di atas untuk akhirnya memiliki rumah mereka sendiri.

Maka, bagi menangani masalah setingan bandar dan kekurangan perumahan untuk golongan kurang mampu, Dewan ini hendaklah mengambil ketetapan bahawa Kerajaan hendaklah meminda syarat pendudukan rumah PPR di seluruh negara daripada bulanan kepada syarat sewa-beli."

[Menteri Kesejahteraan Bandar, Perumahan Dan Kerajaan Tempatan]

19. PR-1351-U(27)007

Datuk Dr. Makin @ Marcus Mojigoh [Putatan] akan mencadangkan :-
"Bahawa Dewan ini mengambil maklum bahawa Chinese Independent School di Malaysia menjalankan taksiran peperiksaan persekolahan mereka melalui sijil yang dikenali sebagai Unified Examination Certificate (UEC) yang mana dibahagikan kepada tiga peringkat iaitu Unified Examination Certificate - Junior Middle (UEC-JML), Unified Examination Certificate Vocational (UEC-V) dan Unified Examination Certificate Senior Middle (UEC-SML).

Dan mengambil maklum juga bahawa, persijilan UEC telah pun diguna pakai dalam persekolahan oleh United Chinese School Committees Association of Malaysia sejak ianya diperkenalkan pada tahun 1975.

Dan mengambil maklum juga bahawa sijil UEC yang diperkenalkan oleh UCSCAM ini telah diiktiraf oleh universiti di serata negara seperti di United Kingdom, Amerika Syarikat, Taiwan, Hong Kong, China, Australia, Kanada, Singapura dan lain-lain negara.

Dan mengambil maklum juga bahawa malangnya, Kementerian Pendidikan dan Kementerian Pendidikan Tinggi Malaysia atau secara khususnya, Lembaga Akreditasi Negara tidak mengiktiraf sijil UEC ini terutama sekali bagi kemasukan ke universiti awam Malaysia, walau pun National University of Singapore yang berkedudukan tempat keempat universiti terbaik di dunia mengiktiraf sijil UEC ini.

Dan mengambil maklum juga bahawa dengan ketiadaan pengiktirafan yang dimaksudkan di atas, negara Malaysia secara tidak langsung mengalami kerugian yang besar di mana pemegang sijil UEC ini terpaksa meneruskan pendidikan tinggi mereka di luar negara di mana aliran wang keluar daripada negara ini dan juga kecenderungan lepasan sijil UEC ini untuk terus bekerja di luar negara adalah tinggi, di mana dalam hal ini negara Malaysia akan kerugian "aliran keluar" tenaga mahir ke luar negara.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan haruslah dengan segera mengiktiraf Sijil Unified Examination Certificate bagi manfaat negara."

[Menteri Pendidikan]

20. PR-1351-U(27)008

Datuk Dr. Makin @ Marcus Mojigoh [Putatan] akan mencadangkan :-
“Bahawa Dewan ini mengambil maklum bahawa kesan pemanasan global dan perubahan cuaca kini menjadi topik perbualan harian di seluruh pelosok dunia di mana ianya bukan lagi satu fenomena tetapi telah menjadi realiti yang mana setiap warga dunia mempunyai tanggungjawab untuk sama-sama melaksanakan langkah-langkah mitigasi bagi mengurangkan impaknya ke atas kehidupan manusia.

Dan mengambil maklum juga bahawa salah satu penyebab utama kedua-dua masalah di atas adalah akibat daripada kesan penebangan pokok-pokok disebabkan aktiviti ekonomi seperti pembukaan ladang dan sebagainya.

Dan mengambil maklum juga bahawa pihak berkuasa tempatan berperanan untuk mengambil bahagian dalam usaha untuk langkah mitigasi bagi mengatasi kedua-dua masalah di atas walaupun dalam bentuk kecil, dengan menanam lebih banyak pokok-pokok di seluruh kawasan seliaan mereka.

Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah meminta pihak berkuasa tempatan untuk segera menanam lebih banyak pokok-pokok di kawasan di bawah seliaan mereka di samping memperbanyakkan kempen menanam pokok untuk menyemai budaya menanam pokok di kalangan rakyat setempat.”

[Menteri Sumber Asli Dan Alam Sekitar]

21. PR-1351-U(27)009

Datuk Dr. Makin @ Marcus Mojigoh [Putatan] akan mencadangkan :-
“Bahawa Dewan ini mengambil maklum bahawa, bagi kawasan Dewan Undangan Negeri N.18 Petagas (Parlimen P.173 Putatan), hanya terdapat sebuah sekolah menengah sahaja iaitu Sekolah Menengah Kerajaan (SMK) Tansau, Putatan untuk menampung murid-murid keluaran lima (5) buah sekolah rendah yang terletak di kawasan yang sama.

Dan mengambil maklum juga bahawa, kerana kekurangan tempat di sekolah menengah, ramai murid daripada kawasan Dewan Undangan Negeri N.18 Petagas terpaksa meneruskan persekolahan menengah mereka di sekolah menengah di kawasan Dewan Undangan Negeri N.16 Luyang, N.17 Tanjong' Aru, N.19 Kapayan dan N.20 Moyog, di mana sekali gus meningkatkan kos persekolahan mereka daripada segi kos pengangkutan dan menyebabkan ketidakselesaan hidup rakyat.

Dan mengambil maklum juga bahawa cadangan pembinaan Sekolah Menengah Kerajaan (SMK) Petagas telah pun dirancang sejak Rancangan Malaysia Ke-Sembilan (RMK9) lagi dan disenaraikan semula dalam

Rancangan Malaysia Ke-Sebelas (RMK11), namun sehingga kini belum terdapat sebarang keputusan tetap bagi permasalahan ini walau pun tapak bagi Sekolah Menengah Petagas serta infrastruktur asas seperti jalan raya telah pun tersedia.

Maka, bagi menangani masalah ini dan mendahulukan rakyat, Dewan yang mulia ini hendaklah mengambil ketetapan bahawa Sekolah Menengah Kerajaan (SMK) Petagas hendaklah dibina dan disiapkan dalam tempoh terdekat seperti yang telah dirancang terdahulu.”

[Menteri Pendidikan]

22. PR-1351-U(27)010

Dato' Kamarudin Bin Jaffar [Tumpat] akan mencadangkan :-

“Bahawa Dewan ini mengambil maklum akan cadangan untuk pembangunan semula kawasan Rumah Pangsa Sri Labuan dan pembangunan semula Zon 1 yang melibatkan Rumah Pangsa Sri Melaka, Sri Johor, Ikan Emas dan Sri Pulau Pinang di dalam kawasan Parlimen Bandar Tun Razak.

Dewan ini juga mengambil maklum kegelisahan majoriti penghuni di perumahan-perumahan yang terlibat akan masa depan mereka akibat daripada cadangan ini.

Maka Dewan ini mengambil kira suasana ini dan memutuskan bahawa segala cadangan pembangunan semula oleh Kementerian Wilayah Persekutuan di kawasan tersebut hendaklah mengambil kira perkara-perkara berikut:

- i . Mengadakan perbincangan dengan semua penghuni, iaitu pemilik dan penyewa selain daripada wakil-wakil blok dan persatuan-persatuan mereka;
- ii. Pihak DBKL mestilah dilibatkan dalam semua perbincangan dan keputusan, selain daripada pihak Kementerian;
- iii. Pemilihan pemaju mestilah ditentukan secara tender terbuka supaya penghuni dan pembeli mendapat tawaran terbaik; dan
- iv. Semua aspek pembangunan mestilah memberikan keselesaan kepada penghuni dengan mengambil kira ciri-ciri berikut:
 - a. Kepadatan setiap blok,
 - b. Keluasan unit
 - c. Kualiti pembinaan lif dan bahan binaan,
 - d . Kemampuan membayar yuran penyelenggaraan oleh pemilik selepas.

[Menteri Wilayah Persekutuan]

23. PR-1351-U(27)011

Dato' Kamarudin Bin Jaffar [Tumpat] akan mencadangkan :-

“Bahawa Dewan ini mengambil maklum dengan penuh kebimbangan akan pergolakan politik antarabangsa mutakhir ini yang mempamerkan satu suasana ketidakstabilan hubungan antarabangsa yang amat kritikal. Dewan juga memerhatikan dengan penuh kerisauan lagak politik Amerika Syarikat di bawah Presiden Trump, politik Eropah ekoran keputusan Brexit oleh Britain, politik Russia oleh Presiden Putin yang antara lain telah mengakibatkan Ukraine diceroboh dan penembakan pesawat MH17, dan lebih dekat lagi, politik Republik Rakyat China yang menuntut sebahagian Lautan China Selatan sebagai wilayahnya.

Maka, sebagai satu langkah peringkat negara dan serantau untuk menghadapi krisis ini, Dewan ini memutuskan untuk mempertegaskan dan menggerakkan semula dengan sungguh-sungguh dasar Asia Tenggara sebagai satu rantau yang aman, bebas dan berkecuali atau ZOPFAN yang telah dipersetujui dan dimeterai pada 27 November 1971 oleh Malaysia, Indonesia, Filipina, Thailand dan Singapura.”

[Menteri Luar Negeri]

24. PR-1351-U(27)012

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan supaya Laporan Ketua Audit Negara berkenaan dengan isu 1MDB (1Malaysia Development Bhd) di bentang dan dikemukakan untuk perbahasan di Dewan Rakyat dengan kadar segera.”

[Perdana Menteri]

25. PR-1351-U(27)013

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan supaya YAB. Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember”.

[Perdana Menteri]

26. PR-1351-U(27)014

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan supaya mengesyorkan kepada KBDYMM Seri Paduka Baginda Yang Dipertuan Agong untuk menubuhkan satu Suruhanjaya Diraja supaya menyiasat dan mengemukakan laporan siasatan terhadap skandal kewangan 1MDB dengan kadar segera.”

[Perdana Menteri]

27. PR-1351-U(27)015

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan selaras dengan titah Majlis Raja-Raja Melayu di mana Akta Majlis Keselamatan Negara 2016 di bentang dan dikaji semula di Dewan Rakyat dengan kadar segera.”

[Perdana Menteri]

28. PR-1351-U(27)016

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan supaya Sijil Peperiksaan Unified Examination Certificate (UEC) yang telah mendapat pengiktirafan antarabangsa diberi pengiktirafan penuh oleh Kerajaan Malaysia.”

[Menteri Pendidikan]

29. PR-1351-U(27)017

Tuan Nga Kor Ming [Taiping] akan mencadangkan :-

“Bahawa Dewan yang mulia ini meluluskan satu ketetapan secara sebulat suara selaras dengan semangat Perlembagaan Persekutuan tahun 1957 dan prinsip "one man, one vote", mana-mana persempadanan semula kawasan pilihan raya jumlah bilangan pengundinya tidak boleh melebihi perbezaan 15% di antara semua kawasan pilihan raya di negara ini.”

[Perdana Menteri]

30. PR-1351-U(27)018
Tuan M. Kula Segaran A/L V. Murugeson [Ipoh Barat] akan mencadangkan :-

“Bahawa Dewan ini mengambil maklum penubuhan entiti persendirian yang dikenali sebagai MyEG menduakan kerja Kementerian Dalam Negeri. MyEG sebagai satu agensi di antara Kementerian Dalam negeri dan orang awam adalah tidak diperlukan, membazirkan sumber-sumber dan mengenakan fi yang tidak berpatutan kepada orang awam. Penubuhan entiti ini mempersoal integriti Kerajaan dan menggalakkan amalan korupsi.”

[Menteri Dalam Negeri]

31. PR-1351-U(27)019
Tuan Liew Chin Tong [Kluang] akan mencadangkan :-

“Bahawa Dewan ini menggesa Kerajaan untuk mengumumkan laporan penuh Jawatankuasa Siasatan Bebas mengenai kejadian kebakaran Hospital Sultanah Aminah Johor Bahru pada 25 Oktober 2016 untuk makluman dan pengetahuan rakyat tentang punca-punca berlakunya kebakaran tersebut. Kerajaan juga didesak untuk menyatakan langkah-langkah yang akan diambil untuk mencegah dan mengelakkan tragedi kebakaran berulang lagi di mana-mana hospital atau pusat perubatan.”

[Menteri Kesihatan]

32. PR-1351-U(27)020
Tuan Liew Chin Tong [Kluang] akan mencadangkan :-

“Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi RM100 juta oleh Kementerian Pertahanan, mesti dibawa ke Parlimen di bahas dan diaudit oleh Jabatan Audit Negara supaya untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara”.

[Perdana Menteri]

33. PR-1351-U(27)021
Tuan Liew Chin Tong [Kluang] akan mencadangkan :-

“Bahawa Dewan ini bersetuju mengurangkan peruntukan untuk JPM dan menyalurkan kepada peruntukan bagi hal ehwal pendidikan, pengangkutan awam, kesihatan dan kebajikan rakyat. Peruntukan untuk Jabatan Perdana Menteri telah dihadkan tahapnya pada tahun 2008 iaitu masing-masing

sebanyak RM3.4 bilion bagi peruntukan pengurusan dan RM3.5 bilion untuk pembangunan. Ini membawa kepada jumlah keseluruhan sebanyak RM6.9 bilion. Berbanding 2017,

anggaran peruntukan pengurusan dan pembangunan telah melepasi tahap ditetapkan pada 2008 tersebut iaitu masing-masing sebanyak RM4.92 bilion dan RM11.019 bilion yang membawa kepada jumlah keseluruhan RM15.94 bilion”.

[Menteri Kewangan]

34. PR-1351-U(27)022

Tuan Hee Loy Sian [Petaling Jaya Selatan] akan mencadangkan :-

“Dewan ini mengambil maklum bahawa Bajet 2016 sebanyak RM50 juta yang diperuntukkan kepada SJK (C) tidak disalurkan pada tahun yang ditetapkan. Dewan yang mulia ini hendaklah mengambil ketetapan bahawa semua peruntukan bajet yang diluluskan di Parlimen haruslah disalurkan kepada pihak yang sewajarnya pada tahun yang berkenaan juga”.

[Menteri Kewangan]

35. PR-1351-U(27)023

Tuan Hee Loy Sian [Petaling Jaya Selatan] akan mencadangkan :-

“Dewan ini mengambil maklum bahawa banyak pengusaha teksi persendirian mahu pun berdaftar di bawah syarikat swasta menghadapi kesukaran dan ada yang terpaksa menutup operasi mereka.

Dewan ini juga mengambil maklum bahawa salah satu punca permasalahan ini adalah dengan kewujudan Uber dan GrabCar yang jauh lebih efisien daripada operasi mereka melalui penggunaan teknologi aplikasi dengan menggunakan telefon pintar. Maka dengan menyedari hakikat ini, Dewan yang mulia ini hendaklah membahaskan langkah-langkah strategik bagi menyelamatkan pengusaha teksi yang ada dalam menghadapi persaingan daripada Uber dan GrabCar ini”.

[Perdana Menteri]

36. PR-1351-U(27)024

Tuan Hee Loy Sian [Petaling Jaya Selatan] akan mencadangkan :-

“Bahawa Dewan ini menolak pembinaan jana kuasa tenaga nuklear di Malaysia yang akan memudaratkan alam sekitar sekiranya berlaku kecuaian dan bencana. Dewan ini juga haruslah membuat ketetapan bahawa sekiranya ia ingin tetap diteruskan harus mendapat referendum sokongan daripada rakyat”.

[Perdana Menteri]

37. PR-1351-U(27)025

Dato' Johari Bin Abdul [Sungai Petani] akan mencadangkan :-

“Bahawa Dewan ini mengambil maklum bahawa, lebih dari 200 ribu pelajar-pelajar setiap tahun akan menduduki peperiksaan SPM. Ada yang berjaya melanjutkan pelajaran ke tahap yang lebih tinggi dan ada yang gagal. Di sinilah jurang pemikiran akan berlaku. Yang berjaya mara terus dalam pelajaran akan mendapat pendedahan yang baik dan akan menjadi warga dan anak bangsa yang berguna kepada masyarakat. Tetapi yang gagal akan teraba-raba dan menanggung risiko terbabas dari landasan yang diharapkan.

Adalah dicadangkan semua pelajar lelaki lepasan SPM dimasukkan ke dalam Program Khas Khidmat Negara / National Service selama dua tahun. Enam bulan pertama dilatih dari segi fizikal dan mental serta ilmu kewarganegaraan. Selebihnya setahun setengah lagi mereka ditempatkan dalam Angkatan Tentera Malaysia atau PDRM. Sebaik sahaja mereka tamat menjalani penempatan di ATM atau PDRM mereka hendaklah digalakkan meneruskan pelajaran sama ada jurusan akademik atau vokasional mengikut kelayakan mereka. Dengan cara ini masalah remaja dapat dikurangkan walaupun tidak diselesaikan. Banyak negara-negara lain telah melaksanakan program ini dengan jayanya”.

[Menteri Pertahanan]

38. PR-1351-U(27)026

Dato' Johari Bin Abdul [Sungai Petani] akan mencadangkan :-

“Bahawa Dewan ini mengambil maklum bahawa, semangat kekitaan dan berpasukan hendaklah ditanam dalam jiwa setiap pelajar sekolah. Setiap pelajar di sekolah rendah atau menengah hendaklah diwajibkan menyertai satu pasukan beruniform dan mereka hendaklah mendapat didikan dari guru-guru yang terlatih dalam bidang-bidang tertentu yang berhubung dengan pasukan tersebut. Sehari dalam seminggu sekolah hendaklah memperuntukkan agar guru-guru dan pelajar-pelajar memakai uniform pasukan masing-masing ke sekolah. Dengan itu pelajar-pelajar akan merasa bangga dengan pasukan mereka dan ini akan membina semangat kekitaan di kalangan pelajar-pelajar dan guru-guru”.

[Menteri Pendidikan]

39. PR-1351-U(27)027

Dato' Johari Bin Abdul [Sungai Petani] akan mencadangkan :-

“Bahawa Dewan ini mengambil maklum bahawa, ramai ibu bapa mengeluh kos menghantar anak-anak ke sekolah makin meningkat mahal. Ini termasuk kos belanja makan harian anak-anak di sekolah. Oleh kerana kos juga pengusaha kantin akan menyediakan makanan yang kurang kualiti dan tidak berzat, malah ada yang membahayakan termasuk menggunakan perisa tiruan dan pemanis yang dilarang oleh Kementerian.

Satu kempen "membawa makanan dari rumah" yang melibatkan banyak Kementerian dan Jabatan hendaklah dimulakan. Jika makanan dibawa dari rumah sudah pasti ianya bersih, berzat dan jauh dari keracunan. Pelajar juga mesti digalakkan membawa air masak putih dari rumah dan dengan ini akan mengelakkan mereka dari meminum air bergas dan air manis yang merosakkan kesihatan pelajar-pelajar. Tindakan membawa makanan dari rumah bukan sahaja memastikan kesihatan terjamin juga mengurangkan kos menghantar anak-anak ke sekolah".

[Menteri Pendidikan]

40. PR-1351-U(27)028

Dato' Johari Bin Abdul [Sungai Petani] akan mencadangkan :-

"Bahawa Dewan ini mengambil maklum bahawa, ramai kakitangan awam yang ada ilmu berniaga dan ada yang terlibat dengan perniagaan secara sambilan. Ramai yang mahu menceburkan diri dalam perniagaan secara langsung tetapi sayang akan hilang pencen jika berhenti dari perkhidmatan awam. Akhirnya mereka berada dalam dua alam dan tidak fokus kepada tugas sebenar. Adalah dicadangkan Kerajaan mengkaji semula dasar

membenarkan kakitangan awam berhenti dari perkhidmatan dan mendapat pencen.

Adalah dicadangkan jika seseorang kakitangan awam telah berkhidmat selama 21 tahun mereka boleh berhenti dan mendapat pencen. Ini samalah dengan anggota Angkatan Tentera Malaysia. Jika ini boleh dilakukan kita akan melihat mereka yang terlibat dalam perniagaan datang dari mereka yang ada pengalaman dan ada networking. Di samping itu tempat yang dikosongkan oleh mereka akan diisi oleh ramai lulusan pengajian tinggi yang tidak mempunyai kerja yang tetap atau sesuai".

[Perdana Menteri]

41. PR-1351-U(27)029

Tuan Fong Kui Lun [Bukit Bintang] akan mencadangkan :-

"Bahawa dewan mencadangkan Kerajaan supaya mempergiatkan usaha untuk menyatupadukan rakyat berbilang kaum di Malaysia yang kelihatan masih lemah dan longgar meskipun Negara telah menjadi Negara merdeka dan berdaulat sejak 60 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi Negara secara bersama dan merealisasikan Impian Malaysia".

[Perdana Menteri]

42. PR-1351-U(27)030

Tuan Fong Kui Lun [Bukit Bintang] akan mencadangkan :-

“Bahawa dewan mencadangkan Kerajaan memulihkan pilihan raya kerajaan tempatan seluruh Negara supaya urus tadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat”.

[Menteri Kesejahteraan Bandar, Perumahan Dan Kerajaan Tempatan]

43. PR-1351-U(27)031

Tuan Manivannan A/L Gowindasamy [Kapar] akan mencadangkan :-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan.

Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama”.

[Menteri Kesejahteraan Bandar, Perumahan Dan Kerajaan Tempatan]

44. PR-1351-U(27)032

Tuan Manivannan A/L Gowindasamy [Kapar] akan mencadangkan :-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh pakar perubatan forensik sendiri bagi mewakili pihak keluarga si mati semasa bedah siasat dijalankan”.

[Menteri Dalam Negeri]

45. PR-1351-U(27)033

Tuan Manivannan A/L Gowindasamy [Kapar] akan mencadangkan :-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia”.

[Menteri Pendidikan]

46. PR-1351-U(27)034

Tuan Wong Sze Phin @ Jimmy [Kota Kinabalu] akan mencadangkan :-

“Bahawa Kerajaan Malaysia mengiktiraf Sijil Peperiksaan Bersepadu Sekolah-sekolah Menengah Persendirian Cina di Malaysia (Certificate of Unified Examination for Independent Chinese Middle Schools in Malaysia) ataupun

UEC sebagai sijil peperiksaan yang setaraf dengan Sijil Tinggi Pelajaran Malaysia (STPM).

Di Sabah, ibu bapa dari kaum dan bangsa selain Cina turut menerima dan memilih sistem pendidikan Sekolah Menengah Persendirian Cina. Malahan, jumlah pelajar di Sekolah - sekolah Menengah Persendirian Cina di Sabah yang bukan dari keturunan Cina adalah antara 25% sehingga 85%.

Kerajaan Sarawak telah mengiktiraf UEC sebagai peperiksaan yang diterima oleh perkhidmatan awam Sarawak. Kerajaan pusat juga telah berkali-kali menyatakan pertimbangan dalam mengiktiraf UEC.

Lebih 100 universiti dari 12 negara seperti Australia, UK, US dan lain-lain telah mengiktiraf UEC dan diterima sebagai sijil untuk memasuki universiti dan pusat pengajian tinggi sejak lebih tiga puluh tahun yang lepas.

Di sini, saya menggesa Dewan ini mengambil ketetapan untuk meluluskan cadangan bahawa UEC diterima oleh semua universiti, pusat pengajian tinggi tempatan dan juga perkhidmatan awam di Malaysia”.

[Menteri Pendidikan]

****UCAPAN-UCAPAN**
(PERATURAN MESYUARAT 17 BAHARU)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 23.3.2017 (Khamis)	1. YB Tuan Sivakumar A/L Varatharaju Naidu (Batu Gajah)	1. Banjir Kilat Di Kampung Baru Nalla, Tronoh	1. YB Menteri Sumber Asli dan Alam Sekitar
2. 23.3.2017 (Khamis)	2. YB Tuan Teo Kok Seong (Rasah)	2. Dilema Yang Dihadapi Oleh 129 Pembeli Premis Di Bandar Satelit Senawang Fasa 2	2. YB Menteri Kesejahteraan Bandar, Perumahan dan Kerajaan Tempatan

**** Ucapan-ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**